

四庫全書

集部

欽定四庫全書

升菴集卷七十九

明 楊慎 撰

瓊花

揚州有蕃釐觀觀中有瓊花即陳後主所詠玉樹後庭
花曲云瓊樹朝朝新也其花後姜好奇者云瓊花無種過
矣宋傅子容詩云比場如礬總未嘉要須博物似張華
因看異代前賢帖知是唐昌玉蕊花注云唐楊汝士云
唐昌觀玉蕊以少故貴王汝玉名為玉蕊王介甫名為

瑒花取其色白也山谷名曰山礬以其可以供染也即
今之梔子花佛經名薝蔔花本草名越桃劉禹錫詩玉
女來看玉樹花異香先引七香車攀枝弄雪頻回首驚
怪人間日易斜張籍詩云五色雲中紫鳳車尋仙來到
洞仙家飛輪回首無蹤跡惟見斑斑滿地花王建詩一
樹瓏璫玉刻成飄廊點地色輕輕女冠夜覓香來處惟
見堦前碎月明注云唐元和中唐昌觀中玉蕊花盛開
有仙女來遊取數枝飄然而去余謂此說未必然蓋因

劉張詩有玉女雲車飛輪回首之句遂傳會其說又因
仙女取花飄然而去遂傳會天下無種之說不知詩人
詠物托言也滇雲處處有之村姑采挿盈路仙女亦何
多乎

梔花

孝子傳尹伯奇採梔花以為食注梔花山梨也山梨今
名棠梨其花春開採之日乾瀹之可充蔬

蓬花

蓬花如毬風起則轉

太白詩注

梨花

梨花有二種瓣圓而舒者其果必甘缺而縐者其果必酸此園丁有驗之言亦物理也

海紅花

菊莊劉士亨詠山茶詩云小院猶寒未煖時海紅花發景遲遲半深半淺東風裏好似徐熙帶雪枝蓋海紅即山茶也而古詩亦有淺為玉茗深為都勝大曰山茶小

曰海紅

款冬花

款冬花即爾雅所稱菟奚顆凍者紫赤花生水中十二月雪中出花郭緣生述征記云洛水至冬凝厲則款冬茂悅層冰之中傳咸款冬賦序曰余曾逐禽登于此山于時仲冬冰凌盈谷積雪被崖顧見款冬勃然始數佛經云朱炎鑠石不靡蕭丘之木凝冰慘慄不凋款冬之花乃知唐詩僧房逢著款冬花正十二街頭春雪時也

詩人之興于時物如此

伊蘭花

蜀中有花名賽蘭香花小如金粟特馥烈戴之髮髻香聞十步經月不散曾少岷為余言此花之香冠于萬卉但名不佳余按佛經云天末香莫若牛頭旃檀天澤香莫若詹糖薰陸天華香莫若伊蒲伊蘭則伊蘭即此花也西域以之供佛後漢書所謂伊蒲之供也蒲即菖蒲花世不恒有貴其難得耳

石楠花

李白詩風掃石楠花魏玉花木狀言石楠野生二月者
花實如燕子曲阜古城顏回墓上有石楠二株大三四
十圍土人云顏子手植之木

蒼蘗花

蒼蘗花即梔子花也陶隱居云其花剪刀六出刺房七
道

旌節花

太平廣記引黎州圖經云黎州漢源縣琉璃城有旌節
花去地二三尺行行皆如旌節蘇子由詩綠竹琅玕色
紅葵旌節花借喻葵形非謂旌節即葵也

末利

茉莉花見于稽含南方草木狀稱其芳香酷烈此花嶺
外海濱恒多自宣和中名著艮嶽列芳草八此居一焉
八芳者金蛾玉蟬虎耳鳳尾素馨渠那茉莉含笑也洛
陽名園記云遠方奇卉如紫蘭抹厲王梅溪集作沒利

又作抹利陳止齋集亦作沒利朱文公集作末利洪景
盧集作末麗佛書翻譯名義云末利曰鬘華堪以飾鬘
北土云柰晉書都人簪柰花云為織女帶孝是也則此
花入中國久矣

蘇蜜那花

佛經謂栴曰尼俱律陀木覆盆子花曰蘇蜜那花余題
大理三塔寺佛會云尼俱律枝洒淨蘇蜜那花點燈用
此二事也

荔枝

白樂天荔枝圖曰荔枝生巴峽間形狀團團如帷蓋葉如桂冬青花如橘春榮實如丹夏熟朶如蒲桃核如琴軫殼如紅繒膜如紫綃瓤肉潔白如冰雪漿液甘酸如醴酪大畧如彼其實過之如離本枝一日色變二日香變三日味變四五日外香色味盡去也此文可歌可詠可圖可畫歐陽公詠荔枝詞曰絳紗囊裡水晶丸亦妙

荔枝六言

曾吉甫荔枝六言二首其一云蕉子定成噲伍梅九應
愧盧前金谷危樓魂斷白州舊井名傳其二云紅皺解
羅襦處清香開玉肌時繡嶺堪憐妃子苧蘿不數西施

杜工部荔枝詩

杜子美詩側生野岸及江蒲不熟丹宮滿玉壺雲壑布
衣鮐背死勞生害馬翠眉須杜公此詩蓋紀明皇為貴
妃取荔枝事也其用側生字蓋為庾文隱語以避時忌
春秋定哀多微辭之意非如西崑用僻事也末二句蓋

昌黎感二鳥之意言布衣抱道有老死雲壑而不徵者
乃勞生害馬以給翠眉之須何為者耶其旨可謂隱而
彰矣山谷謂雲壑布衣指後漢臨武長唐羌諫止荔枝
貢者此俗所謂厚皮饅頭夾紙燈籠矣山谷尚如此又
何以責黃鶴蔡夢弼輩乎

曾子固荔枝狀

陳紫出興化軍祕書省著作佐郎陳琦家於品為第一
江綠出福州類陳紫差大而香味蓋為次也方紅徑可

二寸色味俱美荔枝之大無出此者歲生一二百顆而
已出興化軍尚書屯田郎中方蓁家紫種似陳紫實大
過之出興化軍小陳紫實差小出興化軍宋公荔枝實
陳紫而小甘美亦如之出興化軍宋氏世傳其木已三
百歲藍家紅泉州第一出尚書都官員外郎藍丞家周
家紅初於興化軍為第一及陳紫方紅出而周家紅為
次何家紅出漳州何氏法石白出泉州法石院色白其
大次於藍家紅綠核出福州荔枝核紫而此獨核綠圓

丁香丁香荔枝皆旁蒂大而小銳此獨圓而味尤勝右
十四種皆次第著於錄虎皮色紅而有青斑類虎皮出
福州牛心以狀名之長二寸餘皮厚肉溢出福州惟一
本玳瑁色紅而又有黑點類玳瑁出福州城東硫黃以
色類硫黃朱柿色朱如柿出福州葡萄荔枝穗生一穗
之實至二三百顆然其品殊下蚶殼以狀名龍牙長可
三四寸彎曲如爪牙而無瓢核出興化軍然不常有水
荔枝漿多而淡出興化軍蜜荔枝以甘為名然過於甘

丁香荔枝核如小丁香大丁香殼厚色紫味微澁出福
川天慶觀雙髻小荔枝每朵數十皆並蒂雙實真珠荔
枝團白如珠無核荔枝之最小者十八娘荔枝色深紅
而細長閩王王氏有女第十八好食此因而得名女家
在福州城東報國院冢旁猶有此木或云物之美少者
為十八娘閩人語元人詩青銅三百一斗酒荔枝十八
誰家娘將軍荔枝五代時有此官者種之因以得名出
福川釵頭顥荔枝顥紅而小可施釵頭粉紅荔枝荔枝

深紅而此以色淺為異中元紅實時最晚因以得名火
山荔枝本出南越四月熟穗生味甘酸肉薄閩中近年
有之右二十種無次第荔枝三十四種或言姓氏或言
州郡或皆識其所出或不言姓氏州郡則福泉漳州興
化軍皆有也一品紅言於荔枝為極品也出近歲在福
州州宅堂前狀元紅言於荔枝為第一出近歲在福州
報國寺

沐繼軒荔枝詩

國朝武將能詩者洪武中孫炎其後湯東谷屑績廣帥
王一清定襄郭登人皆知之雲南都督繼軒沐璘字學
皇象畫學米元章詩學六朝盛唐以僻遠人罕知之余
嘗選其數絕句于皇明詩抄其詠臨安荔枝長篇云建
水夫何如厥土旱而熱蠻花開佛桑候禽罷鷓鴣莽雲
覆溟濛海雨滋露翳接地茂緗枝遮空舒黛葉翠葆霞
焜煌錦幄風掀揭香麝忌經過飛颺防盜竊勁雛赤膚
脫肥脊瓊櫟凸明璫怪可殮冰丸訝許啗真珠堆綠雲

瑇瑁乘綵縵鳳爪天下奇龍牙衆中傑飽食慙素飡長吟望林樾

蜜雲龍

東坡有蜜雲龍山谷有箇雲龍皆茶名也

竹坡詩話

紅姑娘

徐一夔元故宮記云棕毛殿前有野果名紅姑娘外垂絳囊中含赤子如珠甜酸可食盈盈繞砌與翠草同芳亦自可愛。慎按此果京師尤多市人鬻之為閨人小

兒之玩紅姑娘之名不改也

長卿簡子

予往歲在大理與姜孟賓讀蕭子雲賦有長卿晚翠簡
予秋紅之句孟賓吳人博學予舉以問曰長卿則草中
徐長卿藥名是也簡子亦必草木名出何書耶孟賓亦
不能知呼取本草徧檢之無有也近觀齊民要術云簡
子藤生緣樹木實如梨赤如雞冠核如魚鱗取生食之
淡泊甘苦乃知予雲引用必此物也聊筆于此王應麟

嘗言得一異事如獲一真珠船恨不與孟賓散帙共欣賞耳

虞美人草

賈氏談錄云褒斜谷中有虞美人草狀如雞冠花葉相對益州草木記云雅州名山縣出虞美人草唱虞美人曲應拍而舞酉陽雜俎云舞草出雅州益州方物圖贊虞作娛唐人舊曲云帳中草草軍情變月下旌旗亂攬衣推枕愴離情遠風吹下楚歌聲正三更烏騅欲上重

相顧艷態花無主
手中蓮鐔凜秋霜
九泉歸去是仙鄉
恨茫茫
宋黃載萬和云
世間離恨何時了
不為英雄少
楚歌聲起霸圖休
野葛荒葵老
吳城暮玉貌知何處至
今芳草解婆娑
只有當時魂魄未消磨

靡草

月令靡草死
呂氏春秋云
孟夏之昔殺三葉而獲大麥
注昔終也
三葉薺芄靡析莫也
見三葉死則大麥可
獲矣
月令本出自呂氏
即以其書解之為宜
董仲舒云

葶藶枯于仲夏歟冬華于嚴霜

蘭草

古樂府蘭草自然香生於大道傍腰鑣八九月俱在束
薪中孟郊詩昧者理芳草蒿蘭同一鋤實本古樂府意

護門草

王筠寓直詩霜被守宮槐風驚護門草物類志曰護門
草出常山取置戶下或有過其門者草必叱之一名百
靈草

虎須草

龍須草可為席出虎丘寺虎須草可為燈炷出金華府
春草巖

烏昧草

范文正公安撫江淮進民間所食烏昧草乞宣示六宮
傳諸戚里以抑奢侈烏昧草即今野燕麥淮南謂麥曰
昧故史從音為文

艮嶽八芳

金蛾玉蟬虎耳鳳尾素馨渠那茉莉含笑

伊蒲伊蘭

西域以伊為伊字最尊如中國天子也蒲曰伊蒲蘭曰伊蘭皆加以尊稱○伊蒲色即優婆塞中國譯為近住○伊蘭即中國賽蘭香也以其香無比故曰伊蘭

鬘花鬘嬌

末利花一名鬘華見佛經錦帶花一名鬘嬌見成都古今記

傍挺側生

左思蜀都賦旁挺龍目側生荔枝故張九齡賦荔枝云
雖觀上國之光而被側生之誚杜子美絕句云側生野
岸及江蒲不熟丹宮滿玉壺諱荔枝為側生雖本之左
思張九齡然以時事不欲直道也黃山谷題楊妃病齒
云多食側生損其左車則特好奇耳

五出六出

冬至陰極陽生梅桃李杏花皆五出也夏至陽極陰生

威靈仙鹿葱射干淨瓶焦桅子花皆六出也出音綴

綿花之始

通鑑梁武帝木綿皂帳史炤釋文云木綿江南多有之以春二三月下種既生須一月三薈至秋生黃花結實及熟時其皮四裂其中綻出如綿土人以鐵鋌碾去其核取如綿者以竹為小弓長尺四五寸許牽弦以彈綿令其勻細卷為筒就車紡之自然抽緒如縑絲狀織以為布按此即今之綿花也。綿有三一曰絲綿出于蠶

緝一曰木綿出于交廣名班枝花三曰草綿史炤釋文
所言形狀是而以解木綿則非也其曰竹為小弓長尺
四五寸今之制綿花弓長五六尺以羊腸為弦彈之聲
如晴雷朱以真有弓弣弣綿一首可證今之綿弓勝于
舊矣丘文莊謂綿花元始入中國殆未考史炤之說也

木綿

唐李商隱詩木綿花發鷓鴣飛又王叡詩紙錢飛出木
綿花南中木綿樹大盈抱花紅似山茶而蕊黃花片極

厚非江南所藝者張勃吳錄云交趾安定縣有木綿樹實如酒杯口有綿可作布按此即今之班枝花雲南阿迷州有之嶺南尤多汪廣洋有班枝花曲

茅栗

茅栗木果也莊子所謂狙公賦茅者今訛作茅栗沈存中嘗辨其非杜詩園收茅栗未全貧正指此物今以茅栗解作蹲鴟之茅一何遠哉

蘭槐

荀子云蘭槐之根是為芷大戴禮蘭氏之根懷氏之苞
漸之修矣君子不近庶人不服注蘭槐香草名槐又作
懷本草云懷者即杜衡也又名衡微香唐詩情人一去
無窮已欲贈懷香恨不逢即此也

苦菜

月令四月苦菜秀今人多不識其的為何物也考神農
本草一名茶草一名游冬凌冬不死詩云誰謂荼苦又
董茶如飴爾雅云荼苦菜是也又顏氏家訓引易通卦

驗玄圖云苦菜生于寒秋經冬歷春乃成一名游冬葉似苦苣而細斷之有白汁花黃似菊又按唐王冰注素問引古月令四月吳葵華而無苦菜秀一句本草吳葵龍葵析為二條其形與性所說不殊孫真人千金方治手腫亦用吳葵唐本草注吳葵云即關河間謂之苦菜者亦既曉了矣乃復分苦菜龍葵二條何耶俗作鵝兒菜又名野苦蕒

苦蕒

菰含南方草本狀云蒟醬葦茛也大而紫曰葦茛小而
青曰蒟醬可以調食故曰醬今永昌人猶以葦茛為豆
豉是可証也自本草注以蒟醬為檳榔葦子非也佐檳
榔葦子自名扶留藤見蜀都賦草本狀亦具列于檳榔
條下與蒟醬全不同

御梨

文選魏都賦中山郡出御梨王昌齡詩霜飛天苑御梨
秋

榮木

爾雅注榮木梧桐也橐鄂皆五陶詩冉冉榮木結根于
茲是也或以為榮華失之

茶子

傳巽七誨峒陽黃梨巫山朱橘南中茶子西極石蜜茶
子觸處有之而永昌產者味佳乃知古人已入文字品
題矣

龍鍾

龍鍾竹名年老曰龍鍾言如竹之枝葉搖曳不能自禁持也

雞菌

蔡氏毛詩名物解引莊子云雞菌不知晦朔今本作朝菌。雞菌菌如雞冠也與莊子云牂生于突義相叶故雲南名佳菌曰雞壇鳥飛而斂足菌形如之故以雞名有以也

鬣葵

撥攔一名鬣葵又曰蒲葵

豨首

爾雅荊蓺豕首呂氏春秋云豨首生而麥無葉神農本草經云夏至之日豕首菜萁先生豕首圖經藥錄謂之天名精一名天蔓菁名精即蔓精轉語也又名蟾蜍蘭今俗名豨蓂草也又蠱實亦名豕首即月令所謂荔挺也以冬至生與此同名異物

顛冬

山海經小隱之山有草名蒿赤莖白華如顛冬也顛冬
天門冬也

包茅

左傳爾貢包茅不入包茅山在麻陽茅生脊益康曰靈
茅揚雄曰璫茅三脊也爾雅謂之藐廣雅謂之苾蒻本
草云生楚地三月採陰乾猺人以社前者為佳名鴉銜
草

負茲

諸侯疾稱負茲茲草也猶言負薪言有疾不能負草也
又云布茲注云茲蓐席也然則負茲者蓋言有病而坐
蓐伏簣也予觀荀子正論篇云琅玕龍茲華瑾以為寶
注龍茲即今之龍須席或曰茲與髭同徐廣茲者藉席
之名列女傳琅玕龍疏疑龍疏即龍茲隋書煬帝欲誇
示諸蕃酋長以中國之華盛賣菜者亦藉以龍須席注
龍須草織成席也淮上安慶府居人多能織龍須席史
記索隱茲公明草也龍須草又有此名亦奇

刺蜜

梁四公子記高昌國遣使貢蜜梁武帝遣杰公迎之謂
之曰刺蜜是鹽城所產非南平城者使者不能諱帝問
杰公對曰南平羊刺無葉其蜜色白而味甘鹽城羊刺
葉大其蜜色青而味薄是以知其偽也杰字止見此音
曷今人以為豪傑之傑誤矣

萬年枝

謝朓詩風動萬年枝唐詩青松忽似萬年枝三體詩注

以為冬青非也草木疏云檍木枝葉可愛二月花白子似杏今官園種之取億萬之義改名萬歲樹即此也

合浦杉

劉欣期交州記云合浦東百里有一杉樹葉落隨風入洛陽城內漢時有善相者說此休徵當出王者特遣人伐樹庾信詩傳聞合浦葉遠向洛陽飛吳均詩三秋合浦葉九月洞庭枝薛道衡吳趨行杉葉朝飛向京洛文魚夜過歷吳州皇甫冉詩心隨合浦葉命寄首陽薇楊

盈川文合浦杉葉飛向洛陽始興鼓木徙于臨武事皆
本此始興鼓木見水經注

菱菱辨

武陵記四角三角曰菱兩角曰菱其字不一今按菱乃
今之菱角菱乃今之雞頭楚辭緝菱荷以為衣若是菱
葉何可以為衣乎又屈到嗜菱蓋決明之菜非水中之
菱也審矣緣楚人名菱為菱所以致後世之紛紛也

稷之名

稷五穀之長故陶唐之世名農官為后稷其祀五穀之神與社相配以為五穀不可偏祭故祭其長以該之稷又名齊或為粢故祭祀之號稷曰明粢而言粢盛者本之禮運粢醴在堂是也稷又名稭呂氏春秋飯之美者有陽山之稭然則稷也粢也稭也字有古今異文語有輕重殊音耳以上羅端良說嗚呼周公大聖也而曰明農則農亦未易明樊遲聖門高弟也而曰學稼則稼亦未易學文人隱于農者也亦云五穀不分五穀誠未易

分也而况芝英乎

花九錫

羅虬作花九錫云一曰重頂幄障風二曰金錯刀剪折
三曰甘泉浸四曰玉缸貯五曰雕文臺座安置六曰畫
圖寫七曰艷曲翻八曰美醕賞九曰新詩詠且曰亦須
蘭蕙梅蓮乃可披襟若芙蓉躑躅水仙石榴之類何錫
之有

優曇鉢

佛書所謂優曇鉢羅花其說漫幻不可知今廣東新興縣有優曇鉢似枇杷無花而實即蜀中無花果也

花足曰萼

或問花蒂何以曰跗曰蒂者花足也故其字從足東督補亡詩白華素足亦指花蒂為足也萼字從萼萼音吁與華字不同今作韓非韓從韋為義從華為聲古者聯牆之履曰韓今俗作靴萼字從萼為義從韋為聲萼草木下垂也非精于六書者不能別此

黃花開四季

花之色無有同者惟黃者必開於土旺四季之月春季則棠棣夏季則黃葵秋季則菊冬季則蠟梅

摘柚蒲桃橄欖

梁使徐君房元魏使陳昭各言方物君房問昭曰蒲桃味何如摘柚答曰津液奇勝芬香減之君房曰金衣素裏見苞作貢向齒自消良應不及此南人重摘柚而輕蒲桃也魏文帝詔示羣臣曰中國珍果甚多蒲桃當末

夏涉秋尚有餘暑醉酒宿醒掩露而食甘而不飴脆而不酸冷而不寒味厚汁多除煩解倦釀以為酒甘於麴藥醉而易醒道之固已流涎况親食之耶南方有橘正酸裂人牙時有甜耳他方之果寧有匹者此北人譽蒲桃而貶橘柚也東坡橄欖詩待得餘甘回齒頰已輸崖蜜十分甜北人不喜橄欖南人語之曰橄欖回味北人笑曰待他回味時我棗兒已甜了半日矣坡詩蓋戲用此語坡詩又云人生所遇無不可南北嗜好知誰賢可

謂達人之言矣



升菴集卷七十九

欽定四庫全書

集部

升菴集卷

八十一

詳校官監察御史_臣劉芬

中書_臣劉源溥覆勘

總校官原任_臣王燕緒

校對官編修_臣勵守謙

謄錄監生_臣林紹龍

欽定四庫全書

升菴集卷八十

明 楊慎 撰

荷

荷芙蓉

又名芙蓉

其莖茄其葉蓮其本蓉其花為齒苞其實

蓮其根藕其中萼中薏。郭璞曰北方人便以藕為荷江東人呼荷葉為芙蓉蜀人以藕為茄或用其母為子花名或用其子為母葉號此皆名字相亂習俗傳誤

桐

東坡云凡木本實而末虛惟桐反之試取其小枝削之皆堅實如蠟而其本皆虛故世所以貴孫枝者貴其實也

葵

葵以葵名者蜀葵即戎葵也楚葵水芹也見說文吳葵即苦菜也王冰素問注引用月令苦菜秀作吳葵華水葵蓐也澤葵蓐苔也鮑照蕪城賦澤葵依井錦葵花名詩所謂視爾如莪也冬葵菜名今之滑菜也又名露葵

終葵繁露也見爾雅名承露可以染蔬俗名胡燕脂又
名染莖子龍葵似吳葵而小菟葵菹也一名天葵劉禹
錫所謂菟葵燕麥是也蒲葵木名椶樹也鳧葵荇也一
名四葉菜防葵藥名地葵地膚也即今掃帚苗廣雅丘
葵歸也又名鴨脚

苴

唐韻苴音涅菜名似蒜生水邊今温州有之名沙蒜其莖酷似男根又有淡菜絕類女殺亦陰陽之產也

桂

尸子曰春華秋英曰桂王維詩人閒桂花落夜靜春山
空秋華者乃木犀巖桂耳

桂子

劉績霏雪錄載杭州靈隱寺月中墜桂子事似涉怪異
余按本草圖經云江東諸處多於衢路間拾得桂子破
之辛香古老相傳是月中下也不知當地何意獨無焉
寧非月路耶餘杭靈隱寺僧云種得一株近代詩人多

所著述漢武洞冥記云有遠飛雞朝往夕還常含桂實
歸於南土所以北方無之南方月路固宜有也月路之
說尤怪異漫志之白樂天詩偃蹇月中桂結根依青天
天風繞月起吹予下人間自注云杭州天竺寺有月中
桂子

荔蘿

楚辭被薜荔兮帶女蘿齊書隱逸傳該討芝桂借訪荔
蘿

薜荔

楚辭被薜荔兮帶女蘿注薜荔無根緣物而生不明言
為何物也據本草絡石也在石曰石鱗在地曰地錦繞
叢木曰長春藤又曰龍鱗薜荔又曰扶芳藤今京師人
家假山種巴山虎是也

又曰凡木蔓
皆曰薜荔

翠荻

荻當作茆
黃莢實也

江淹去故鄉賦北風析兮絳花落流水散兮翠荻踈翠
荻草名

翠管

水葱生水中如葱而中空又名翠管王維詩水驚波兮
翠管靡是也此草可為席唐六典東牟郡歲貢葱席六
領

紫梨

左思蜀都賦有紫梨津潤之語注不言其狀按蜀有梨
樹花以秋日其花紅色唐李遵有進紫梨表元王秋澗
有秋日詠紅梨花詞可證

盧橘

上林賦盧橘夏熟注不言何物近注唐詩三體者指為
枇杷世皆宗其說然予觀上林賦又有枇杷樵柿之文
不應重出也偶閱吳錄云朱光祿為建安郡中庭有橘
冬月樹上覆裹之至明年夏色變青黑味絕美此即盧
橘盧黑也此說近是

櫛棗

櫛棗俗作軟棗一名牛妳柿一名丁香柿文選蜀都賦

所謂楔也蜀中製扇以此果榨油染紙為之北夢瑣言
石晉趙瑩家有樗棗樹婆娑異常四遠俱見有望氣者
云合有登台輔者後瑩出將入相

華草

祥瑞圖曰雙蓮為草孝經援神契曰王者德至於地則
華草感注華草並頭蓮也

陳枚

流甘露於槐木扇惠風於陳枚

言施恩於
衰朽也

穠稭

古歌高田種小麥穠稭不成穗男兒在他鄉安得不憔悴

稭稭

孟子曰五穀不熟不如稭稭說文稭稭也莊子稭米之在太倉郭璞云稭似稭布地生穢草也莊子又云道在稭稭呂氏春秋飯之美者陽山之稭高誘注云關西謂之糜冀州謂之聚口珎切皆一物也廣雅解云如黍黑色

稗有二種一黃白一紫黑紫黑者芑有毛北人呼為烏禾人不甚珍農家種之以備他穀之不熟耳合此數解觀之以稷為穠貴而為五穀之長尊而配太社之神轉相解詁以為烏禾黑稗為孟子莊生之所賤農人之所不甚珍亦由形色相類而誤大姦似忠大詐似信況于物乎

芑華

芑華日舒夜斂芑華晝合宵炕故芑寒芑煖○諺云韭

為草鍾乳芡是水琬黃也。芡葉蹙邱如沸球。蘇子
由詩芡葉初生縐如縠南風吹開輪轉轂紫苞青刺攢
蜩毛水面放花波裏熟森然赤手初莫近誰料明珠藏
滿腹可謂極體物之妙矣姜梅山詩蜩腹出波烹芡實
裹蹄和露摘蓮房

智豆

智豆見唐六典音彎左傳注智井亦音剡如人目無瞳
子也

榿木

姑蘇守溪王公濟之在閬日論杜詩聞知榿木三年大
因問先父榿木蜀產榿字何音先父曰音欽守溪曰當
依韻書音楷先父曰音欽則鄉人農夫皆識之若作楷
音不知何木矣因舉王荊公榿木詩曰濯錦江邊木有
榿野園封植佇華滋地偏幸免桓魋伐歲晚還同庾信
移王乃悅服蓋王公平昔極愛荊公詩文而此詩王公
亦偶不記憶耳

蒲柳

世說蒲柳之質望秋先零蒲水楊也齊地記云無棣縣有秦王繫馬蟠蒲堪為箭非菖蒲之蒲也若然豈堪繫馬又中為箭乎爾雅楊蒲柳其言可證矣

西水

余嘗疑本草水類中不載西水後讀五代邵陽令胡嶠臨敵記云嶠於回紇得水種以牛糞結實大如斗味甘名曰西水是西水至五代始入中國也文選浮甘水於

清泉蓋指王心甜心耳

錦竹

杜子美有從韋明府續處覓錦竹兩三叢詩黃鶴注云
考竹譜竹紀無錦竹意以其文如錦名之竹紀有蒸竹
筴墮竹其皮類繡豈即此乎余觀錦竹他無見惟杜詩
有之劉會孟批杜錦樹行云題曰錦樹使人刮目錦竹
亦新惜無拈出者耳近閱梅宛陵集錦竹詩雖作湘竹
紋還非楚筠質化龍徒有期待鳳曾無實本與凡草俱

偶親君子室又注其下云此草也似竹而斑始知黃鶴有金注之昏耳

扶竹

武林山西舊有雙竹院中所產脩篁嫩篠皆對抽並肩
王子敬竹譜所謂扶竹譬猶海上之桑兩兩相比謂之
扶桑也扶竹之筩名曰合歡按律書注伶倫取嶰谷之
竹陽律六取雄竹吹之陰律六取雌竹吹之蜀涪州有
相思崖昔有童子中女相說交贈今竹有桃釵之形筩

亦有柔麗之異崖名相思崖竹曰相思竹孟郊詩曰竹
嬋娟籠曉烟指此竹也又有苦竹黃苦青苦白苦紫苦
孟浩然詩歲月青松老風霜苦竹餘

筓竹

石介詩斷霞半赭燕脂木零露偏留筓竹叢筓竹蜀中
產蜀甸國尤多玉篇筓古惠切竹名傷人則死其竹又
名防露言其上密防露下疎來風見竹譜

竹實

李旼該聞集云舊稱竹實為鸞鳳所食今近道竹間時見花開如棗結實如麥江淮號為竹米以為荒年之兆其竹即死信非鸞鳳之食也近有餘干人來言彼有竹實大如雞子竹葉層層包裹味甘勝蜜食之令人心肺清涼生深竹林茂密處頃因得之雖日久枯乾而味常存乃知鸞鳳所食必非常物也

碧筒杯

唐人碧筒杯詩酒味雜蓮氣香冷勝於冰輪困如象鼻

瀟洒絕青蠅

藁荷子

丘文莊公羣書抄方載中蟲毒用白藁荷引柳子厚詩云
云且曰子厚在柳州種之其地必有此種仕於茲土者
其物色之蓋亦不知為何物也余謂丘公之博洽而不
識世之識者亦罕矣按松江志引急就章注曰白藁荷
即今甘露考之本草其形性正同

五加皮

五加皮蜀中名白刺顛陶隱居云釀酒主益人道家
用此作灰亦以煮石與地榆並無別法東華真人煮石經
曰舜常登蒼梧之山曰厥金玉之香草朕用偃息正道
此五加也又異名曰金鹽王屋山人王常曰何以得長
久何不食石蓄金鹽母又曰寧得一把五加不用金玉
滿車譙周巴蜀異物志文章草贊曰文章作酒能成其
味以金買草不言其貴文章草即五加皮也

君子樹

太平御覽引廣志曰君子樹似檉松曹爽樹之于庭戴
嵩詩接樾稱交讓連樹名君子江總詩連楹君子樹對
幌女貞枝皆用此事

君遷樹

文選蜀都賦平仲君遷皆木名注缺按司馬溫公名苑
云君遷子如馬妳俗云牛妳柿是也今之造扇用此柿

油

可補文
選註

共枕樹

金史四庫全書
卷八十
潘章有美容楚人王仲先慕之與同學一見相愛情若
伉儷同衾共枕死亦同槨羅浮山塚上生樹柯條枝葉
無不相抱號曰共枕樹

四海亭

花名有海字者皆從海外來海棠海榴是也海紅花即
山茶也海桐花即七里香也亡友陸子淵欲以四花名
為四詞然不知海紅花即山茶也

梅竹軒

惹烟籠月竹弄粉圍香梅

黃柑啟

始霜之旦風味照坐擘之香霧喫人脉不粘辦食不留

滓

東坡詩香霧霏霏欲喫人

齏白韭黃

齏之美在白韭之美在黃○齏作薤

萬條寒玉

唐人郊居詩門外晚晴秋色老萬條寒玉一溪煙萬條

寒玉言竹也

侯騷蟲薺

廣志云侯騷蔓生子如鷄卵既甘且冷輕身消酒又名
簡子藤蕭子雲賦所謂簡子秋紅也○魏武帝食品曰
蟲薺子如彈丸○二物奇品唐人賦中嘗引用之

桂蠹蓼蟲

楚辭注桂蠹以喻食祿之臣蓼蟲以喻放逐之士

男青女青

男青木名見羅浮山記女青亦木名見道藏有女青鬼
律

蔓菁變蓮

婺州僧清簡園中蔓菁變為蓮與晉時長安僧寺蔥化
為蒞事相類太平御覽云豐年則蝗化為蝦

草龍珠帳

蒲桃藤陰地幅員十丈仰觀若幃蓋焉其房實磊落紫
瑩如陸時人號為草龍珠帳

柳絲柳線

柳謂之絲柳謂之線

見夢書

睡蓮舞草

睡蓮夜則花低入水南海有之。○舞草虞美人草也雅州有之。○睡蓮亦可對眠柳

杉錦棘綾

埤雅槌謂之羅杉謂之錦棘謂之綾言槌木之文如羅棘木之文如綾也初則木文如織後則織文如木故有

槎羅杉錦棟綾之號。○秦風隰有樹槎爾雅槎羅槎其
文細密如羅有赤白二種赤羅文棘白羅文緩

菊有兩種

說文鞠治牆埤雅曰鞠如聚金鞠而不落故字从鞠周
禮后服鞠衣其色黃也又作鞠注日精也散草麗秋株
日華子菊有兩種花大氣香莖紫者為甘菊花此日精
也花小氣烈莖青味苦為野菊花其花相似惟以甘苦
別之其葉可羹其花可釀其囊可枕其實可仙

菊亦有
實但難

得爾

兔絲燕麥

古樂府云道旁兔絲何嘗可絡田中燕麥何嘗可穫言
虛名無用也蓋兔絲非絲而有絲之名劉禹錫文作兔
葵燕麥非也今按兔絲虛名是也燕麥滇南霑益一路
有之土人以為朝夕常食非虛名也或者古昔雲南未
通中國但有燕麥之名未見其實乎

范堅石榴賦

紅鬃內艷頰牙外標似花燈之映翠幕若丹瓊之廁碧
瑤

箛箒即蒟勒

韻書四豪箒字下注云箛箒竹名而不詳其說按異物
志南方思牢國產竹可礪指甲竹譜云可剉爪是也崔
鵬詩曰時一出輕芒暄暄落微雪又李商隱射魚曲云
思箒弩箭磨青石綉額蠻渠三虎力是知亦可作箭今
廣東新州有此種製成琴樣為礪甲之具用之頗久則

微滑當以酸漿漬之過信宿則澁復初字又作澁勒東坡倦者澁勒暗蠻村

根抵卽根蒂

韓非子樹木有直根有曼根直曰曼橫曰抵固其抵則生長深其根則視久

與老子深根固蒂同

樹藝之法

后稷教民樹藝之法曰五時見生而樹生見死而獲死又曰五穀生於五木汜勝之曰黍生於榆大豆生於槐

小豆生於李麻生於楊大麥生於杏小麥生於桃穠生
於柳五木自天生五穀待人生故五穀候于五木也故
曰見生而樹生也靡草死而麥秋至草木黃落未乃登
故曰見死而穫死也

藪即艾子

藪魚既切說文玉篇俱云煎菜萁也漢令會稽郡歲貢
藪子一斗字一作艾揚雄蜀都賦木艾椒離本草蜀州
食菜萁其高大長及百尺者蜀人呼其子為艾子宋

景文公艾子贊曰綠實若莢味辛香必投粒羹臙椒桂之匹范石湖成都古今記云艾子菜莢類也實正綠味辛蜀人每進酒輒以一粒投之少頃香滿盃酸但藪與艾蓋一物相似有食菜莢藥菜莢之分如川芎有茶芎藥芎之別也

如何隨刀而改味

顧凱之啟蒙記曰如何隨刀而改味神異經曰南方荒中有如何之樹三百歲作華九百歲作實有核形如棗

子長五尺金刀割之則飴非此則辛食之得地仙西陽
雜俎曰祁連山上有仙樹一名四味木其實如棗以竹
刀剖則苦以木刀剖則酸以蘆刀剖則辛以金刀剖則
甘卽此物也或曰此卽仙經所謂火棗

二十四番花信風

梁元帝纂要一日兩番花信陰陽寒暖各隨其時但先
期一日有風雨微寒者卽是其花則鶯兒。木蘭。李
花。楊花。榴花。桐花。金櫻。黃芳。楝花。荷

花。檳榔。蔓羅。菱花。木槿。桂花。蘆花。蘭
花。蓼花。桃花。枇杷。梅花。水僊。山茶。瑞
香。其名俱存然難以配四時十二月姑存其舊蓋通
一歲言也荆楚歲時記小寒三信梅花山茶水僊大寒
三信瑞香蘭花山礬立春三信迎春櫻桃望春雨水三
信菜花杏花李花驚蟄三信桃花棣棠薔薇春分三信
海棠梨花木蘭清明三信桐花菱花柳花穀雨三信牡
丹荼蘼棟花此後立夏矣此小寒至立夏之候也

升菴集卷八十

欽定四庫全書

升菴集卷八十一

明 楊慎 撰

龍生九子

俗傳龍生九子不成龍各有所好弘治中孝廟御書小帖以問內閣李文正公具疏以對據圭峰羅玘蘆泉劉績之言承上問而不蔽下臣之美賢相之盛節也文正嘗為慎言今影響記之錄於此一曰鼎鬲形似龜好負重今石碑下龜趺是也二曰螭吻形似獸性好望今屋

上獸頭是也三曰蒲牢形似龍而小性好叫吼今鐘上紐是也四曰狴犴形似虎有威力故立於獄門五曰饕餮好飲食故立於鼎蓋六曰蚣蝱性好水故立於橋柱七曰睚眦性好殺故立於刀環八曰金猊形似獅性好烟故立於香爐九曰椒圖形似螺蚌性好閉故立於門鋪首又有金吾形似美人首尾似魚有兩翼其性通靈不寐故用警巡

八駿

八駿之名見於列子而他書所載互有不同今列之於後

駒騊

漢書作華駟唐人名紫騊今日棗騊

綠耳

一作騶駟又作騶耳

赤驥

又作赤驢宋世名好頭赤

白縹

縹古犧字形似牛

渠黃

一作駟驢又名翠黃又名訾黃

踰輪

又作駟踰蜀都賦所謂魚文也馬目如魚劉卽

賦蓋如飛鶴馬似遊魚

山子

又作岫子今之五明馬又名玉頂又名叱撥又

名玉抱肚又名花抱肚太白詩所謂五花馬也

古以為奇今以為忌曰破面孤蹄鬼也不騎劉

先主之的盧亦是此種的白也猶白頸烏曰的

𩇑烏

盜驪

一曰溫驪今之鐵青色荀子作纖離又作淺驪

盜驪言少竊驪色猶九扈名竊玄竊黃也又作

駒栗驪栗色也後代轉名駒駖

馬

馬之為物最神駿故古之詩人畫工皆借之以寄其
精工若杜工部蘇東坡諸詩極其形容殆無餘巧余
又愛杜公作九馬贊云姚宋廟堂李郭治兵帝下毛
龍以馭羣英何其雄偉也李燾長編載元祐西域貢
馬云龍顙而鳳膺虎脊而豹章振鬣長鳴萬馬皆瘖
句亦奇矣

良馬

歸風逮日上取於天文也歷塊絕塵下取於地理也綠蛇青虬取於龍也紫燕黃鵠取於鳥也言其疾如鳥也驚帆言其迅如帆也足練言其光如練也其餘或取於鳳或取於虎或取於魚或取於兔草木或桃花艾葉蘭筋蒲稍采色則玄黃赭白珍寶則金騶裏玉逍遙周公係易之爻則屯渙大畜小壯四爻擬其辭孔子廣卦之說則乾震坎巽四卦擬其象語曰驥不稱其力稱其德

也

五花三花

唐詩朝騎五花馬又五花馬千金裘杜詩蕭蕭千里馬
箇箇五花文隋丹元子步天歌五箇花文以馬鬣剪為
五花或三花皆象天文也白樂天詩馬鬣剪三花唐六
典云外牧歲進良馬印以三花飛鳳之字

聾蟲

淮南子云馬聾蟲也而可以通氣志猶待教而成況人

乎注聾蟲喻無知聾蟲之名甚奇

物有五倫

樂安李氏云虎狼有父子之仁謂其不相食也此語有病惡獸之父子不相食者多矣何獨虎狼乎今訂云羔乳鳥哺有父子之仁蜂房蟻穴有君臣之義睢鳩鴛鴦有夫婦之別鴈陣有兄弟之序逸鶯呼鷄有朋友之情

物性

狐狼知孤虛虎豹識衝破

烏燕

禽經云烏向啼背栖燕背飛向宿毛詩燕燕于飛莊姜
送歸妾義取諸此故曰上下其音差池其羽皆背飛之
義送別之情也

胡燕

玄中記胡燕斑胸聲小越燕紅襟聲大李賀詩勞勞胡
燕怨酣春吳越春秋越燕向日而熙丁儻芝詩曉幙紅

襟燕

黃蝶

胡蝶或黑或白或五彩皆具惟黃色一種至秋乃多蓋感金氣也李白詩八月蝴蝶黃深中物理今本改黃為來何其淺也白樂天詩亦云秋花紫濛濛秋蝶黃茸茸

鵲鷁

劉欣期益州記鵲鷁水鳥黃喙長尺餘南人以為酒器蓋即今之鵲頂也

鷓鴣

鷓鴣不鳴禮月令文也禮引詩又作盍旦注渴旦鳥夜
鳴急旦也郭璞方言注鳥似鷄冬無毛晝夜鳴今北方
有鳥名寒號蟲即此也說文作鴝鴒又作鷓鴣蓋自旱
省為干故鷓或作鴝也猶禽經鴻鴈之鴈作鷓斥省為
干故鷓或為鴝皆古鴈字也然則鷓鴣字正當作鷓省
作鴝作鷓非鷓乃鷓鳥古以其羽為勇士冠者非此同
也盍旦渴旦皆以義借用耳唐詩暗蟲啼渴旦涼葉墜

相思

熊館

山民云熊於山中行數千里悉有跼伏之所必在石岩枯木中山民謂之熊館惟虎出百里外則迷失道路

虎僕

皇甫松大隱賦書抽虎僕射用牛蝻博物志有獸緣木文似豹名虎僕毛可取以為筆今俗名九節狸張季文嘗以此筆見貽信為佳也

牛蝻見淮南子

鷓鴣

鷓鴣海鳥今俗名禿鵝是也出景渙小說

鷓鴣

左傳青鳥氏司分者也杜預云青鳥鷓鴣立春鳴立夏止疏作鷓鴣易通卦驗立春楊柳津鷓鴣鳴與左傳合然未知此鳥今名為何鳥也

玉鷄

水經注昔王子晉與道士浮丘同遊伊洛之浦始受玉

鷄之瑞於此水。唐宗楚客詩紫庭金鳳闕丹禁玉鷄川

潮鷄

唐李德裕詩三更津吏報潮鷄臨海異物志云石鷄清響以應潮慧軀輕逝以遠繫石鷄即潮鷄也

鵲井

鵲雀羣繞旋飛謂之鵲井必有風雨可對蟻封蟻封戶

天將大雨也

酉陽雜俎
易林

鬼車

鬼車九頭鳥也白澤圖謂之蒼鷖帝鵠書謂之逆鵠夫子子夏見而歌之裴瑜注爾雅言鵠麋鵠是九頭鳥也。小說周公居東周惡聞此鳥命庭氏射之血其一首餘猶九首。按夫子鵠歌曰逆毛鵠兮一身九尾長兮只言九尾不言九頭

絲鵠

絲鵠大如鷓俗訛為慈老

山都

鄧德明南康記云山都形如崑崙奴通身生毛見人輒閉目張口如笑好在深澗中翻石覓鱗噉之

荼首

音蔡茂

博物記雲南郡出荼首其音為蔡茂是兩頭鹿名也永昌有之

翠碧

唐韻鵠

音立

水狗也注小鳥青似翠食魚江東謂之水狗

陸魯望翠碧詩云紅襟翠翰兩參差徑拂煙華上細枝
春水漸生魚易得不辭風雨坐多時石林詩話云江淮
有水禽號魚虎翠羽而紅首顏色可愛崔德符通羊驛
詩云翠裘錦帽初相識魚虎彎環掠岸飛

鴈馬

月令春候鴈北秋鴻鴈來又鴻鴈來賓冬鴈北向七十
二候而鴈居其四周易乾為馬坤為牝馬說卦震坎皆
有馬象八卦而馬象其四何也鴈知時識序德禽也馬

引重致遠德獸也聖人遠取諸物之義也物有德且取之況人乎哉

蝦蟇

風俗通云一跳八尺兩跳丈六從春至冬袒裸相逐無他所作掉尾肅肅說者以為蝦蟇非也蓋言夏馬患蚋掉尾振擊常肅肅也蝦蟇下馬音相似唐人名下馬陵為蝦蟇陵亦此類也

叱撥

唐詩紫陌亂嘶紅叱撥叱撥馬名宋羣牧判官王明上
羣牧故事六卷中載九龍十驥之名稱西河東門之骨
法無不具焉其說馬之毛色九十一種又云叱撥之別
有八曰紅耳叱撥曰鴛鴦叱撥曰桃花叱撥曰丁香叱
撥曰青叱撥曰騮叱撥曰紫騮叱撥曰榆叱撥又曰北
方馬以叱撥及青白紫純色綠繫騮為上驄赤驃騮白
赤色為中往驄驄駱駝驢為下

野干

肇慶有騰豸嶺山產騰豸狀類木猴頭正方類人髮長
尺餘常覆其面欲有所視輒搖頭以手披之。佛書所
言野干即此

鳬鷺

禮曰庶人執鷺尸子曰野鴨為鳬家鴨為鷺不能飛翔
如庶人守耕稼而已古者以鷺為贄必家畜之禽又取
義於不能飛翔可証也管輅云家鷄野鷺猶尚知時滕
王閣序落霞與孤鷺齊飛皆誤以野鴨為鷺也文人用

字或取聲諧韵便豈可據乎楚辭泛泛若水中之鳬梅
都官詩野鳬眠岸有閒意梁簡文詩寒鳬共浦飛其用
字體物却不舛誤博雅云鳬鶩鴨也亦混家禽野鳥為
一矣

批頰

唐盧延遜詩樹上諸詠批頰鳥牕間壁剝叩頭蟲王半
山詩翳木窺搏黍藉草聽批頰元人送春詩批頰穿林
叫新綠韓致堯春恨詩云殘夢依依酒力餘城頭批頰

伴啼鳥平明乍捲西樓幙院靜初閒放轆轤批頰蓋鳥
名但不詳為何形狀耳或曰即鶻頰也催明之鳥一名
夏鷄俗名隔墻鷄

匱鼃

說文解鼃字云匱鼃也徐鉉云蟲名蓋亦不知何物也
余近觀臨海水土志云鼃似龜一名匱鼃又名鼃鼃一
枚有三斛膏

饒燈

魴魚即嬾婦魚也多膏以為燈照酒食則明照紡績則暗佛經謂之饒燈云

魴魚

說文魴魚出樂浪藩國有兩乳葉子奇曰奔魴也名濁非魚非魴色如鮎有兩乳在腹下雌雄陰陽類人相傳嬾婦所化佛書謂之饒燈鳴瓊泛醪則明披紉辟廬則暗

蟹圖

呂亢守台州命工作蟹圖凡十二種一曰螭蚌二曰撥
棹三曰擁劍四曰螯螯五曰竭朴六曰沙狗七曰望潮
八曰倚望九曰石蜆十曰蝦江十一曰蘆虎十二曰彭
蜺又有黃甲龜鼈蟬蟻在海中龜鼈島之東此可補蟹
譜之遺然蟹譜亦甚略首不引汲冢書海陽巨蟹其殼
專車何邪

呖哈

東坡嶺南詩有云稻涼初呖哈柳老半書蟲注不知蛤

為何物近覽嶺表錄異云唐林鶻為高州太守有牧童

牧牛閒田中有蛤鳴

原注嶺南呼蝦蟆為蛤

遂捕之蛤跳入深穴

掘之乃蠻酋冢蛤乃無蹤而穴中得銅鼓其旁多鑄蛙
鼃之狀疑鳴蛤即鼓精也東坡嶺南詩即用嶺南事豈
淺學者可注耶

蚪蚘

張有復古編以蟲名蚪蚘書作子方按汜勝之術云牽
馬令就穀堆食數口以馬踐過穀為種無蠹蚪蚘也蚪

𧈧二字見於汜勝之書汜乃漢人亦云古矣張有生其
後一千年餘何據而云俗作𧈧𧈧必欲去蟲而作子方
省則省矣觀者只以爲人之字安知其爲蟲乎此其隘
而不通東坡所謂強作解事者也皮日休隱書亦用𧈧
𧈧字禮記方以類聚注方蟲名即𧈧也

怪魚

李淳風感應經云河有怪魚乃名爲鰐其身已朽其齒
三作此即鱷魚也南州志云斬其首乾之掾去其齒而

更復生

石鱗

揚雄蜀都賦石鱗水螭石鱗石魚也如石燕石蟹之類

蠔山

韓文公詩蠔相粘為山十百各自生按本草衍義云牡蠣附石而生硨磲相連如房故名蠣房讀如阿房之房

音傍見史記

一名蠔山初生海畔才如拳石四面漸長有一

二丈者一房內有蠔肉一塊肉之大小隨房所生每潮

來則諸房皆開有小蟲入則合之以充腹宋翟忠惠焦
山詩僧居螺山迷向背佛宇蜃氣成吹噓

吉弔

龍生三卵一為吉弔上岸與鹿交或在水邊遺精流槎
遇粘裹浮木枝如蒲桃馬號紫梢花道樞所謂龍鹽有
益帷箔者也

鰩鬚

爾雅以鰩為大蝦出海中者長二三丈游行則豎其鬚

高於水面故其字從高鬚長數尺可為簾也又閩中有
五色蝦梅蝦蘆蝦泥蝦苗蝦

純鼃

純將風則踴鼃欲雨則鳴故以純識風以鼃識雨

純江猪也

蝸蟾

鄒陽柳賦蝸蟾厲響蜘蛛吐絲

自照

王符潜夫論蓬中拾自照謂螢火也杜子美詩暗飛螢

自照李長吉詩俊健如生獠肯拾蓬中螢皆用其語

係臂

係臂海錯之名楊孚嶺南異物贊曰係臂如龜生於海洲欲先捕之必祭必求而不信者風波覆舟

龜卜

唐李華謂龜卜之法當廢余竊是之蓋聖王以麟鳳龜龍為四靈而獨於龜剝之煮之何其慘也摘巢毀卵則鳳不留剝胎剔孕則麟不遊聖王禁之何其仁於麟鳳

而不仁於龜也書曰魚鼈鳥獸咸若龜卜之法盛行則自天子以至於庶人皆用之一歲殺龜何啻數百萬是鱉亦咸若而龜獨不咸若耶古者龜卜亦上世習俗之故聖人不能遽廢也龜筮皆有書孔子贊易而不贊龜蓋亦欲從此廢彼也自孔子贊易之後筮法盛行卜法廢矣亦不見後人之迷於吉凶也且惠迪從逆吉凶在人龜何知焉傳稱武王伐紂卜而龜焦以至仁伐不仁何事於卜卜之不吉將遂止乎是則大事不細也其後

漢高帝入關不聞其卜龜吉而始勝也至漢文帝將入
繼乃猶龜卜賴得吉兆若其不吉將遂不行漢之大事
去矣史記龜策傳載宋元王不忍龜之死欲貸之反覆
千百言愚謂元王之不忍於龜即齊宣之不忍於牛也
二君其有仁心者哉宣王以羊易牛善矣元王聽衛平
得龜可霸之說卒殺其龜何曾聞元王之興且霸乎余
以為龜卜釁鐘皆可廢也且古之釁鐘與鼓以為除去
妖災也今世此法不行亦未見鼓鐘之為人妖災也

五酉

孔子厄於陳蔡夜有一人長九尺皂衣高冠咤聲動左右子路出與戰相搏久之孔子曰何不探其腮如其言仆於地乃一大鯁魚也孔子曰此物胡為來哉吾聞物老則羣精依之凡六畜之物皆能為怪故謂之五酉五行之方皆有其物酉者老也物老則為怪也殺之則已

燈蛾

俗傳燈蛾螢火所化故慕光

白翎鵲

札木言於汪汗曰我與君是白翎雀他人是鴻鴈耳白翎雀寒暑常在北方鴻鴈則南飛就暖耳言已心堅而他人之心不可保也

白頭烏

三國典略曰侯景篡位令飾朱雀門其日有白頭烏萬許集於門樓童謡曰白頭烏拂朱雀還與吳杜工部詩長安城頭頭白烏夜飛延秋門上呼蓋用其事以侯景

比祿山也而千家注不知引此

朱鬣馬

符堅時大宛獻天馬朱鬣五色鳳膺麟身

王維詩玉角
靴與朱鬣馬

阿濫堆

驪山多飛禽名阿濫堆明皇御玉笛采其聲翻為曲子

名馬左右皆傳唱之

尉遲偓中
朝故事

鶯啄蝗

元成宗大德三年揚州淮安蝗在地者為鶯啄食飛者

以翅擊死詔禁捕鷺

鶴在陰

鶴愛陰而惡陽雁愛陽而惡陰易曰鳴鶴在陰傳曰鴻

鴈隨陽故汲冢書目鶴曰陰羽

見王會篇

禹貢名鴈曰陽鳥

鶴鷄獄

范百祿曰牽牛以蹊田而奪之牛此王安石鶴鷄獄也

謂相牽
引以入

鷺絲謎

杜牧之詠鷺絲詩霜衣雪髮青玉嘴羣捕魚兒溪影中
驚飛遠映碧山去一樹梨花落晚風

分明鷺
絲謎也

信天翁

信天翁鳥名滇中有之其鳥食魚而不能捕俟魚鷹所
得偶墜者拾食之蘭廷瑞詩云荷錢荇帶綠江空唼鯉
含藻淺草中波上魚鷹貪未飽何曾餓死信天翁亦可
以為諷也廷瑞滇之楊林人

吐金鳥

酉陽雜俎云魏明帝時昆明國貢辟寒鳥常吐金屑如粟昆明今為雲南腹裏之縣不聞此鳥其遠至夷徼亦不聞也成式之好張大虛無之言其著酉陽雜俎亦似郭子橫洞冥記唐人杜陽雜編全構虛誑殊無一實或者遠夷多詐以金屑飼鳥欺侮中國如秦蜀金牛之事未可知也

王跌踢

爾雅王跌踢郭景純注云即螻蛄似蜘蛛在穴中有蓋

邢昺疏曰此蜘蛛之一種也穴居布網穴口唐劉崇遠
金華子云長安閭里中小兒競以織草刺地穴間戲以
手撫地曰顛當出來既見草動則釣出赤色小蟲子形
如蜘蛛江南小兒謂之釣駱駝其蟲子之背若駝峯也
搢紳會同時有以此質疑衆皆默然有明經劉寡辭者
曰此爾雅所謂王跌踢也景純之注可校焉證之於書
衆皆稱服慎按小兒呼顛當即跌踢音之反也螻蛄也
蚨蛄顛當也字不同耳此可補爾雅疏之遺

漣窻魚

方言康之為言空也注漣窻空貌亦丘墟之空無也莊
子曷胡視其窻亦指墟墓言可証今澉江有魚溟人呼
為漣窻魚其魚亦乾而中空

千人捏

千人捏似蟹大如錢殼甚堅壯夫極力捏之不死俗言
千人捏不死因為名或以謔市倡

魚味美

諺云寧去屢世宅不去鰈魚額言其味美也又里語云
洛鯉伊魴貴於牛羊言洛水渾深宜鯉伊水清淺宜魴
也又曰居就梁水魴今遼東梁水之魴特肥而厚

相馬經

伯樂相馬經有隆顙跌目蹄如累麴之語其子執馬經
以求馬出見大蟾蜍謂其父曰得一馬略與相同但蹄
不如累麴爾伯樂知其子之愚但轉怒為笑曰此馬好
跳不堪御也所謂按圖索駿也韓文公詩飛黃騰踏去

不復顧蟾蜍亦影略用此事

考工記

考工記以脰鳴者以注鳴者以旁鳴者以翼鳴者以股
鳴者以胸鳴者鄭玄注脰鳴鼃黽之屬注鳴精列屬旁
鳴蜩蟬屬翼鳴蟋蟀屬股鳴螽斯屬胷鳴榮原屬許氏
說文蜩鼃詹諸以脰鳴者榮蜺蛇醫以注鳴者蟬以旁
鳴者蜩蟻以翼鳴者蟋蟀以股鳴者蟻大龜以胷鳴者
二家解不同可以參考

蚶子贊

蚶子蚌屬形如瓦筒橫從其理五味具充又千歲蝙蝠
化為魁陸別名為蚶形似瓦屋

畫獅子贊

東坡題獅子曰圓其目仰其鼻奮鬣吐舌威見齒舞其
足前其耳左顧右盼喜見尾雖猛而和蓋其戲岩岩高
堂護燕几啼呼顛沛走百鬼嗚呼妙哉古陸子

烏賊魚贊

魚有烏賊絕短八足集足在口縮喙在腹形類鞋囊其

名烏賊吸吸噉墨迷射水慝

海物
名記

禽制在氣

陰符經云禽之制在氣王起云玄龜食蟒飛鼠斷猿狼
蟲啗鶴青要食虎皆以小制大言在氣不在形也

隨兇科雉

呂氏春秋楚莊王獵於雲夢射隨兇而獲之申公子培
劫而奪之王欲誅之左右諫止不出三月子培病死子

培之弟請曰臣之兄有功於車下臣嘗讀故記云殺隨
兇者不出三月王令人發平府視故記果然乃厚賞焉
說苑亦載此事而以隨兇為科雉何子元餘冬緒錄云
隨兇科雉不見他書今人亦無有識之者余謂子元但
求之書而不求之悟也隨兇者隨母之兇科雉者甫出
科之雉豈有別物哉

寶誌公偈

人言斑鳩拙我道斑鳩巧一根兩根柴便是家緣了

鶴有二種

列子湯問篇蒲且子之弋也弱弓纖繳乘風振之連雙
鶴於青雲之上相如賦雙鶴下玄鶴加以為遊獵之盛
楚辭鶴酸鴈鳬煎鴻鶴注鶴鶴也淮南子鳳凰曾逝萬
里之上鴻鵠鶴莫不憚焉蓋鶴之類以其蒼色故曰鶴
物類相感志玄鶴長足羣飛天將霜必先鳴鶴之警露
也此鶴之一種說文鶴鵠也關西呼為鵠鹿此又一
種故名混麋鹿裴瑜注爾雅曰鵠鵠是九頭鳥夫子與

子夏河上所見奇鶴九首既云奇鶴則非常鶴矣劉駒
駱玄根賦一足之變九頭之鳥是也河上歌又言其一
身九尾信為妖物也杜詩三更鶴鵠呼又啼鵠催明星
此則常鶴爾又有禿鶴風止則下風起而後去急就章
所云來風即爰居也又別一種

鳥名王母

齊郡函山有鳥名王母使者昔漢武帝登山得玉函長
五寸帝下山函化為鳥飛去世傳山上有王母藥函常

令鳥守之杜詩子規夜啼山竹裂王母晝下雲旗翻

足足般般

薛道衡文足足懷仁般般擾義足足鳳也般般麟也說
文鳳鳴節節足足相如封禪書般般之獸樂我君囿

鸛鸛周周

禽經鸛鸛之信不如鷹周周之智不如鴻

韓盧宋鵠

義訓曰韓盧宋鵠良犬也盧純黑色鵠黑白色李賀詩

練香熏宋鵲獵犬而以香薰之蓋貴公子驕奢之習猶
莊子云愛馬者以蜃盛溺也

燕𦉰鶯轉

禽經燕以狂𦉰鶯以喜轉。𦉰視也夏小正來降燕乃
睇轉曲名鶯聲似歌曲故曰轉

蟋蟀寒蟬

風土記蟋蟀鳴於朝寒蟬鳴於夕。此蟬也而分二蟋
蟀朝蟬寒蟬夜蟬也

六燕乙鴻

陸佃謝吏部尚書表六燕相停試銓衡其輕重乙鴻遼
遠欲審別其飛翔。九章算術五雀六燕飛集於衡衡
適平一雀一燕而異處則雀重而燕輕。張融曰鴻飛
天首遼遠難明楚人以為鳬越人以為乙鴻常一耳

尋常丈尺

禽經云雛上無尋鷄上無常雉上有丈鷄上有赤上言
飛而上也雛之上不能尋鷄之上不能常鷄雉予也倍

尋曰常雉上能文故計丈曰雉左傳都城百雉是也鷄之上能赤赤古與尺通莊子云斥鷃斥亦尺也

雀鷩熊蹯

杜弼移檄梁武云徒探雀鷩無救府藏之虛空請熊蹯詎延晷刻之命雀鷩趙王主父為故太子章所逼餓死事熊蹯楚成王為太子商臣所弑事其後臺城之禍索蜜不得何以異此庾信哀江南賦亦云探雀鷩而未飽待熊蹯而詎熟弼言於未形之先信述於已形之後其

偶合耶抑有意耶

鷹隼靈龜

抱朴子曰八卦生鷹隼之所被六甲出靈龜之所負說者謂鷹隼之羽文亦有八卦之象未驗無以知其然否也

鹿食九草

山谷有一帖云胡居士嘗言鹿性驚烈多別糧草恒食九物餘則不嘗九草者一曰葛葉及花鹿葱鹿藥白蒿

水片甘草齊頭蒿山耳薺菴也享神用其肉者以其性
烈清淨故也凡餌藥者勿食鹿肉必不得力以鹿常啖
解毒之草能散諸藥性也此可補本草及齊民要術之
遺

黃鳥宿淵

韓文公詩注引東方朔詩海水暴竭黃鳥宿淵

八蠶之綿

文選吳都賦國稅再熟之稻鄉貢八蠶之綿注引劉欣

期交州記云一歲八蠶繭出日南也慎按漢俞益期牋云日南蠶八熟繭軟而薄又永嘉記云永嘉有八輩蠶一曰蛭玆蠶三月績二曰柘蠶四月初績三曰蛭蠶四月績四曰愛玆五月績五曰愛蠶六月末績六曰寒玆七月績七曰四出蠶九月初績八曰寒蠶十月績凡蠶再熟者皆謂之玆此則八蠶之實也李賀詩將餽吳王八繭蠶則直謂一蠶之收當八繭耳一歲八績恐誇者之過也

天祿渴烏

漢靈帝修南宮鑄天祿蝦蟆轉水入宮又作翻車渴烏
灑路。天祿即大蝦蟆伯樂之子按圖索駿以蝦蟆為
馬即天祿也天祿之形漢人多刻石肖之即古詩所謂
天鹿辟邪眠莓苔也

天鹿辟邪

一角為天鹿兩角為辟邪

水螢草螢

螢火有二種有草螢有水螢梁蕭和賦云聊披書以娛
性悅草螢之夜翔此草螢也唐李子卿有水螢賦云水
螢為蟲惟蟲能天彼何為而化草此何事而居泉腹可
自持故無羨於蟹足能自運亦自隣於蜃色動波間狀
珠還於合浦影懸潭下若星聚於潁川此水螢也月令
腐草化為螢說文作蠋解云馬蠋也淮南子作妍皆水
螢之名狀亦猶蝶有草蝶水蝶二種云

桐花鳳畫扇

李德裕畫桐花鳳扇賦序云成都夾岷江磯岸多植紫
桐每至春暮有靈禽五色小於玄鳥來集桐花以飲朝
露及花落則煙飛雨散不知其所往有名工繪於素扇
余戲作小賦書其上其略曰續茲鳥於珍筵動涼風於
羅薦發長袂之清香掩短歌之孤嘯愚按此則川扇之
始也今川扇一種以青紙為地畫人物花鳥於上此其
遺製乎劉績霏雪錄云即東坡詞所謂綠毛么鳳俗名
倒掛者唐僧隱巖詩五色毛衣比鳳雛深叢花裡只如

無美人買得偏憐惜移向金釵重幾銖又劉言史有題
蜀客楊生江亭云垂絲蜀客涕沾衣歲盡長沙未得歸
腸斷錦城風日好可憐桐鳥出花飛李之儀有阮郎歸
一詞詠倒掛云朱蜃玉羽下蓬萊佳時近早梅探花情
味久安排枝頭開未開○魂欲斷恨難裁香心休見猜
果知何遜是仙才何妨如夢來自注云此鳥以十二月
來一名收香倒掛又名探花使性極馴好集美人釵上
宴客終席不去人愛之無所害尤為異也

燕子打海青

海東青鷹之鷙猛者也燕子之弱能剪之獵者知其事
元歐陽玄詞持獵回車駕卻道海青逢燕怕

鴨鵝非杜鵑

韻書鵝字注云杜鵑此解非鵝鴨鵝也唐詩作批鵝今
名山呼其鵝上有一點白宋歐陽公有鴨鵝詞略云龍
樓鳳閣鬱崢嶸深宮不聞更漏聲紅沙蠟燭愁夜短綠
窓鴨鵝催天明蓋直宿禁中所作也審如韻書之言則

宋初宮禁已有杜鵑不待邵子天津橋始聞矣殊可笑也

高齋無白鳥

荊州江古岸有李姥浦浦中偏無蚊蚋之患梁元帝金樓子云荊州高齋無白鳥余坐寢處其中及移餘齋則蚊聲如雷數丈之間如此之異何子元云北京某街蚊多某坊蚊少其無蚊處雖帳幕可無顧士廉云松江亦然又某門外城河中可里餘絕無一蚊郡人暑月嘗移

舟避宿其間余以何顧兩公之言叅之水經注紀李姥
浦金樓子紀高齋二事信有此理滇中環湖苦多蚊而
寶珠寺乃絕無影響其理不可曉也

鴛央食射工

春秋經書有蜚傳云南方淫女氣所生一名短狐狀如
鼈含沙射人又名射工玄中記云長三四寸鴛央鴛鷺
蟾蜍悉食之

海物異名記

萬震著

海物異名記密丁魁蛤之子也江瑤柱海月也天嚮瓦
蠨蛸子也膏葉盤海鏡也西施舌鱸子也西施乳河魴
膈也

楊慈湖譽蚊

江山黃借菴戲作驅蚊賦一篇謂虎可德化鯉可文驅
蚊最不靈為血肉喪軀其借以垂戒亦正論也楊慈湖
簡作夜蚊詩反其意而譽蚊謂其傍耳皆雅奏觸面皆
深機勝於人之耳提面命而頑銅莫曉蓋以蚊為靈於

人也異哉其見乎夫麟鳳龜龍世莫不以為靈物蚊蠅
蚤蝨世莫不以為惡蟲自六朝至宋元雖文士詩客嘲
辭戲語未有譽蚊蠅蚤蝨而貶麟鳳龜龍者況以蚊而
貶人乎慈湖主張象山之禪學一時從其說者猶少故
憤而發此言耳慈湖深入禪學既謂蚊為靈物何不學
古禪僧躬至團風陽羅以身齋餓蚊乎議論一偏如此
可以講學明道邪

金衣公子錦帶功曹

吐綬鳥謂之錦帶功曹即詩所謂邛有旨鷁也鷁本草名而紋似綬故字从鷁从艸

豹文鼠

郭璞爾雅序豹鼠既辨其業益顯注漢武帝時謂孝廉郎終軍既辨豹文之鼠人服其博物爭相傳授爾雅之業又摯虞三輔決錄云竇攸舉孝廉郎光武大會靈臺得鼠如豹文以問羣臣莫有知者攸對曰鼯鼠也見爾雅詔案秘書如攸言賜帛百匹此事蓋兩見

鼯鼠

易鼯鼠貞厲注以為貪而畏人按玉編鼯鼠頭似鬼尾有毛黃黑色按形狀乃今之鼠狼也故貪而畏人象之

沙鼠

沙鼠今之黃鼠也

狐疑鼯豫

梁黃門侍郎明少遐曰狐性多疑鼯性多豫狐疑猶豫因此而傳耳乃知猶即鼯也

流離

尹子曰詩詠流離史書梟獍流離鳥名少好長醜盖毛
鄭舊說也

鵙

月令鵙始鳴鵙即博勞也左傳謂之伯趙樂府謂之百
勞今不識為何鳥按禽經注云伯勞飛不能翔翔直刺
而已形似鸛鵒但鸛鵒喙黃伯勞喙黑以此別之易林
曰鵙必單棲鵙必匹飛此鳥好雙飛未嘗雙棲亦能擊

搏鷹集於林則盤旋鳴聒俟鷹飛輒擊之俗呼為鳳皇
皂隸言百鳥畏之也蜀中名駕鵲滇中名鐵鸚哥又名
榨油郎五更輒鳴不止至曙乃息

文人誤謬

蔡中郎以反舌為蝦蟆淮南子以蛭為蟻蠓詩義以蛭
為螻蛄高誘以乾鵲為蟋蟀誤謬何啻千里

太平

漢書三登曰太平。北史積儲九稔謂之太平鳳文明

之祥太平之象故以是終焉



升菴集卷八十一